



Sulineramik Inuussutissarsiuqartut Kattuffiat

Postboks 9 • 3900 Nuuk • Tlf.: +299 32 21 33 • Fax: +299 32 49 39 • E-mail: sik@sik.gl

Aatsitassanut Naalackersuisoqarfik

Postboks 1015

3900 Nuuk

e-mail asn@nanoq.gl

Nuuk, ulloq 9. juuli 2021

Uranimik misissueqqaarnermut, ujaasinermut piiaanermullu inerteqquteqarnissaq pillugu inatsisissatut siunnersuut pillugu tusarniaanermut akissut

Inatsisissatut siunnersuutip tusarniaassutigalugu saqqummiunneqarnerani siulliullugu erseqqissarneqarpoq siunnersuummut tunngaviusoq tassaasoq uranimik “attueqqusinngiluinnaarnermut politikkip eqquteqqinneqarnissaa pillugu naalackersuinikkut kissaateqar-neq”.

Taama siunertalimmik inatsisiliorniarluni tusarniaassummik taamaattumilluunniit takkut-toqarsinnaanera tupigusuutiginnigitsuugassaangilaq – ullutsinni aatsitassarsiornermi tek-nikkikkut, isumannaallisaanikkut ilisimasaqarnikkullu killiffiusut eqqarsaatigalugit, minne-runngitsumillu nunatsinni aningaasaqarnikkut inuussutissarsiornikkullu periarfissat eqqar-saatigalugit.

Tassami uranimik misissueqqaarnermik, ujaasinermik piiaanermillu inatsisitigut maanna inerteqquteqarnialernermut tunngatillugu apeqqutigisariaqarpoq ilumut ilisimaneqarner-soq aatsitassarsiorfinni (aamma uranisorfinni) teknologii ukiut kingulliit 40-t ingerlane-ranni qanoq pitsaanerulersimatigisoq – soorlu sulisartut illersorneqarnissaat eqqarsaati-galugu, avatangiisit illersorneqarnissaat eqqarsaatigalugu il.il. Alaatsinaattunillu nalune-qanngikkaluarpoq nunatsinni ukiuni kingullerni aatsitassarsiornikkut pilersaarutaasartut nunani tamalaani malitassat qaffasinnerpaat tunngavigalugit ingerlanniarneqartartut.

Aamma apeqqutigisariaqarpoq Naalackersuisut ilisimaneraat taamatut siunnersuuteqar-nermikkut nunatta siunissaa SIK-llu isumaqatigiissutai malillugit sulisartuusut aningaasar-siatigut atugarissaarnerulernissaraluaq qanoq innarlertigissallugu.

Makku eqqarsaatigisariaqarput:

- 1) Maannakkut maani nunami aalisarneq kisingajaat isumalluutigineqarpoq. Qujanar-tumillu Naalackersuisut siunniuppaat aalisapiluttoqassanngitsoq, tassa nungusaa-taanngitsumik aalisartoqassasoq. Tamatuma kingunerisaanik ukiuni tulluuttuni qu-lini aalisartut ikilisariaqassapput, nunamilu aammattaaq sulisut ikilissallutik.
- 2) Maannakkut illoqarfiit pingasut kisimik ukiuni kingullerni 20-ni inoqassutsimikkut amerliartorsimapput, tassalu Nuuk, Sisimiut aamma Ilulissat (Tasiilaq inoqassutsi-migut amerliartorfiugaluarluni nunaqarfii ilanngukkaanni inui ikiliartorput).

Taamaattumik maannakkut naalackersuisuusut ilumut soqutigunikkut aamma sineriassu-

atta inoqaannarnissaa, taava silatusaarnerunngilluinnarpoq siunnersuuteqassalluni sunaluunniit uranitaqalaarpat misissuisoqassanngilluinnartoq. Aammami misissuiniartilluni uraneqarnersoq imaasiinnarlugu takuneqarsinnaasanngilaq, sineriassuatsinnilu sumi uraneqarnersoq tamakkiisumik ilisimaneqarani. Imaassinnaavormi maannakkut misissuivigi- niarneqartut uranimik akullit, sulii ilisimaneqanngiinnartut.

Nunatta kujataa sukkasuumik inuerukkiartorpoq, sulisartullu kattuffianni ilaasortatta atugarisaat tassani ajorsiarput. Narsami illut igalaavi qisummik matooraannakkat takussaaleralluttuinnarput – sulilu takussaaleralluttuinnassallutik siunnersuut taamatut isikkoqartillugu akuerineqassappat.

Maniitsup avannaa' tunginnguani aatsitassaqaqarpoq saviminissanik qaqtigoortunik annertusinnaasunik, aammali uranimik, akoqarfiusumik. Tassanilu aatsitassarsiorneq ingerlanneqarsinnaagaluarpat Qeqqata Kommunia atugarissaarnerulissagaluarpoq. Tamannali ajornarsilluinnassaaq inatsisissamut siunnersuut taamatut isikkoqartillugu akuerineqassappat.

Taamaattumik apererusunnarsivoq: Qanoq isillusi ataqatigiisumik piujuaannartitsinissamik sulissuteqarsinnaavisi aalisartut nunamut qaqsussat aammalu aalisakkerivinni sulisartut suliuinnaartussa at allamik suliffissaqartinngikkussigit?

Siunnersuut taamatut iluseqartillugu SIK-p tapersernaviannngilaa.

Aammali maluginiarnarpoq aatsitassarsiornerit akuerineqassappata aatsitassat uranimik qanoq akoqartiginissaannik killissaliisoqarsinnaanera inatsisissatut siunnersuummi eqqartorneqarmat. Oqimaassutsip 100 ppm-ianut (0,01 procentianut) killiliisinnaaneq taaneqarpoq.

Nipi taanna upernassaaq Inatsisartunut qineqqusaarnermi tusartakkatsinnit allaaneruvoq. Taamanimi politikerit maanna partiinit naalakkersuisuusunit pisut "attueqqusinngilluinnarnissaaq" isumavianik isumaqartillugu atorpaat, Kuannersuarni ingerlanniaraluakkanut assingusunut sunulluunniit akerliliissutigalugu. Taamaattumik politikerit pineqartut qinersisitik nassuiaattariaqalerpaat.

Inussiarnersumik



Jess G. Berthelsen,
siulittaasoq